

四庫全書

史部

欽定四庫全書

皇朝文獻通考卷四十八

選舉考 二

舉士

康熙二年停止八股文體鄉會試以策論表判取  
士分為二場第一場試策五道第二場四書論經  
論各一篇表一道判五條直省學政亦以策論考  
試生童

三年更定科場試題鄉會考試自甲辰年為始頭  
場策五篇二場用四書本經題作論各一篇三場  
表一篇判五道

四年禮部侍郎黃機疏言制科取士稽諸往例皆  
係三場先用經書使士子闡發聖賢之微旨以觀  
其心術次用策論使士子通達古今之事變以察  
其才猷今甲辰科止用策論減去一場似太簡易  
恐將來士子勦襲浮詞反開捷徑且不用經書為

文則人將置聖賢之學於不講恐非朝廷設科取士之深意臣請嗣後復行三場舊制庶士子知務實學而主考鑒別亦得真儒以應國家之選下部知之

六年吏部議覆福建道御史李棠條奏例監考補中書三年後即陞部屬進士舉人乃遲至十年之久始得官職嗣後例監考授中書之例應行停止將各科進士照年分前後一缺五人咨取考試得

旨各科進士不必拘年分前後人數有願考者預行選取  
遇缺即補

又

命滿洲蒙古漢軍准赴考試先是八旗生員舉人進士停  
止考試至是復

命滿洲蒙古漢軍與漢人同場一例考試其生童於鄉試  
前一年八月內考試從御史徐誥武請也

又禮部議八旗教習缺出舉人內有願就教習者

准國子監一體考取從之

九年奏准二甲三甲進士俱以知縣用因推官已裁故也

十年吏部奏八旗滿洲監生識滿漢字者考試繕譯止識滿字考試繕寫優者授為正八品以部院筆帖式補用其漢軍監生識滿漢字者照滿洲監生例考試取用止識漢字者照漢監生考職例以州同等官用從之

十一年

勅順天鄉試及會試仍用滿漢監察御史料理場務

十五年議政王大臣等議覆禮部疏言

朝廷用人雖文武兼資然八旗子弟尤以武備為急  
恐專心習文以致武備懈弛今值用武之際若令  
八旗子弟仍與漢人一體考試必偏向讀書有誤  
訓練現今已將佐領下子弟一名准在監肄業亦  
自足用除現在生員舉人進士錄用外嗣後請將

旗下子弟考試生員舉人進士暫令停止應如所請從之

又吏部奏滿洲蒙古漢軍旗下生員既經停其考試應將伊等以無品筆帖式註冊錄用從之

十六年禮部奏本年添行鄉試查直隸江南浙江三省貢監數多應各遣考試官河南山東陝西山西貢監數少應令河南省遣官一同考試湖廣江西歸併江南省福建歸併浙江省考試以入場應



試人數計算於十五名中取中舉人一名不必另  
取副榜於本年九月內考試從之

十八年

召試博學鴻詞

欽取五十人分別授職先是十七年奉

諭旨自古一代之興必有博學鴻儒振興文運闡發經史

潤色辭章以備顧問著作之選朕萬幾時暇遊心文翰  
思得博洽之士用資典學我朝定鼎以來崇儒重道培

養人才四海之廣豈無奇才碩彥學問淵通文藻瑰麗  
可以追踪前哲者凡有學行兼優文詞卓越之人不論  
已仕未仕著在京三品以上及科道官員在外督撫布  
按各舉所知朕將親試錄用其餘內外各官果有真知  
灼見在內開送吏部在外開報該督撫代為題薦務秉  
公延訪期得真才以副朕求賢右文之意嗣經內外諸  
臣保薦陸續送部又奉

諭旨所舉官人俟全到之日考試恐有貧寒難支者戶部

量給衣食於是月給俸廩及柴炭銀兩至是集諸人於  
體仁閣考試

欽命試題賦一篇詩一首

上親覽試卷大學士掌院學士參閱分為四等曰上上曰  
上曰中曰下以彭孫通為第一共取五十卷上上  
卷二十作一等上卷三十作二等其中卷三等下  
卷四等俱落第又於上卷中斥去一卷

上自取嚴繩孫卷補之爰

命閣臣取前代制科舊例查議授職尋議查得兩漢授無  
常職晉上第授尚書郎唐制策高者特授以尊官  
其次等出身因之有及第出身之分宋制分五等  
其一二等皆不次之擢三等始為上等恩數比廷  
試第一人四等為中等比廷試第三人皆賜制科  
出身第五等為下等賜進士出身得

旨俱授為翰林院官於是分別定議內陞道員授為侍讀  
邵吳遠一人候補道員郎中授為侍講湯斌李來

秦施閏章吳元龍四人進士出身之主事中行評  
博內閣中書知縣及未仕之進士授為編修彭孫  
通張烈汪霽喬萊王頊齡陸業錢中諧袁佑汪琬  
沈珩米漢雯黃與堅李鎰沈筠周慶曾方象瑛金  
甫曹禾十八人舉貢出身之推知教職革職之檢  
討知縣及未仕之舉貢廕監布衣俱授為檢討倪  
燦李因篤秦松齡周清原陳維崧徐家炎馮勗汪  
楫朱彝尊邱象隨潘耒徐鉉尤侗范必英崔如岳

張鴻烈李澄中龐塏毛奇齡吳任臣陳鴻績曹宜  
溥毛升芳黎騫高詠龍燮嚴繩孫二十七人共五  
十人俱充史館官纂修明史又奉

諭旨杜越傅山王芳穀等文學素著念其年邁從優加銜  
以示恩榮因俱授為內閣中書聽其回籍

二十年以軍興旁午准撫臣所奏貴州本年鄉試  
於壬戌年補行

又改增楚省中額先是因滇逆變亂於康熙十六

年改照中省取中湖南平定撫臣請仍改為大省  
額數取中從之

二十二年補行雲南省辛酉科鄉試

二十三年

諭大學士等曰滿文中書皆論旗分漢文中書不論旗分  
如此則一旗或多或少今應照旗均分其有餘者令解  
任候缺滿洲進身之階不可不加選擇嗣後部院各衙  
門中書缺出俱令考試補授

又吏部覆奏助教各官應加考試錄用得

旨職掌教習廕官生應選學優者補用若用文學庸劣之人何以表率生徒以後著吏部考取仍將試卷送閱具奏

二十四年刑科給事中楊爾淑疏言試士先以八股首闢七藝重在四書請自乙丑科以後會試及順天鄉試四書題目俱乞

皇上欽定從之凡鄉會試屆期先一日恭請試題密送內



簾考試官其五經及二三場仍令考試官擬出照  
例恭進著為例是年會試二場表題亦出自

欽定各直省鄉試試官出題錯誤者照例處分

又定會試三場畢主考等官遴選試卷十本繕寫  
恭進自第一名至第十名俱由

欽定仍送場內拆號填榜以後會試及順天鄉試並同但  
止頭場文字雍正二年合進三場揭曉後刊刻試  
錄登科錄即於試錄內並載三場中式文擇其尤

者每題一篇正副主考作前後序以進

二十八年兵部議覆兵科給事中能泰奏言考取  
滿洲生員宜試騎射應如所請

上命如議又奉

諭旨滿洲以騎射為本學習騎射原不妨礙讀書考試舉  
人進士亦令騎射倘將不堪者取中監箭官及中式人  
一併從重治罪旋經奏准奉天八旗考試亦如之

臣等謹按戴記云古者天子以射選諸侯卿大夫

士諸侯歲獻貢士於天子天子試之於射宮其容  
體比於禮其節比於樂而中多者得與於祭其諸  
侯有慶則益地以示賞反是者讓之削地以示罰  
射之於舉士其重如此孔子射於矍相之圃觀者  
如堵墻古之儒者未有不能射者也自後世溺於  
章句而文武判為兩途懷鉛握槧之儒幾不知弓  
矢為何事寬衣博帶以號於人曰士也抑知六藝  
均為士人所有事習書廢射則得一藝而失一藝

人才之偏而不全遠遜三代者職是之故我

朝以武功定天下而

國書繕譯貫串經史創千古所未有凡考試滿洲進士舉人必先是二者乃准入闈以其為

國家本務不可逐末而忘夫肇始是以

功令所在八旗有不與試之士而無不能射之人入則含毫挾冊出而躍馬彎弧要皆為有用之學承平無事蒐苗獮狩危從塞外雞翹豹尾之間射雉

獲鹿各具所長有事則公卿可為將帥頗牧出於  
禁廷行師一二萬里之外指揮坐定無事登壇選將  
如往代委曲繁重之所為也竊考是年定滿洲考  
試魚閱騎射遼海為

興京重地例亦如之考之戴記射義舊文益見

聖朝制作殆有酌古今而盡善者歟

又九卿議覆左副都御史梅鋐疏言會試定例分  
南北中卷後又於南北中卷之內各分左右致閱

卷者不盡衡文祇算卷數以定中額請仍照定例  
止分南北中卷概去左右名色應如所請併將江  
南廬州等府滁州等州舊係中卷者俱歸南卷其  
雲南貴州四川廣西四省去其中卷名色每科雲  
南定為雲字號額中二名四川定為川字號額中  
二名廣西定為廣字號額中一名貴州定為貴字  
號額中一名康熙二十九年會試

恩詔加額應將雲南四川各加中二名廣西貴州各加中

金史卷一百一十五  
一名從之至三十年五月復分江南浙江為南左  
江西湖廣福建廣東為南右直隸山東為北左河  
南山西陝西為北右四川雲南為中左廣西貴州  
為中右仍照定例各計卷數之多寡憑文取中至  
安廬鳳三府滁和徐三州改歸南卷俱照原議行  
三十二年禮部議覆國子監祭酒吳苑疏言八旗  
之人學習制藝者日多而中式之額太少請增加  
名數查鄉試滿洲蒙古原取中舉人十名今增六

名漢軍原取中舉人五名今增三名會試滿洲蒙古原取中進士四名今增二名漢軍取中進士二名今增一名從之

三十四年增雲南鄉試解額十五名增貴州鄉試解額十名

三十五年廣八旗滿洲蒙古漢軍直隸各省鄉試解額滿洲蒙古四名漢軍二名順天生員十七名南北監生十四名江南二十名浙江湖廣福建各



十七名河南十五名山西陝西各十三名江西十八名山東廣東四川各十四名廣西十名

三十六年宗人府禮部奉

諭旨國家樂育人才振興文教將使海內英雋之士靡不蒸蒸蔚起矧宗室子弟系託天潢豈無卓越之姿足稱令器久宜甄拔獎掖俾克有成考諸前史以公族應制舉入仕者代不乏人今屬籍所載日益繁衍除已授爵秩人員外閒散子姓素無職業誠恐進取之途未闢致

嚮學之意漸墮嗣後八旗宗室子弟有能力學屬文奮志科目應令與滿洲諸生一體應試編號取中則賦質英異者咸服習於詩書而學業成就者不阻抑於仕進凡屬宗室人人得以自効而於朕興賢睦族之至意亦用是以允愜焉爾等衙門即遵諭行

又

命直省選拔文行兼優之士府學選拔起送二名州縣學一名滿洲蒙古二名為拔貢生

又禮部以順天鄉試同考官開列知縣等具奏奉  
上諭考例用十六員此疏內進士知縣止有十人若應試  
之人預擬此十人必為試官有所鑽營則作弊更易著  
將員外主事以下小京官及知縣守部進士一併開列  
著為令

又准順天鄉試貢監生五經中式

又

諭大學士王熙等曰鄉試為掄才大典出題理宜詳慎今

覽各省所進題名錄中其題目多有未當如福建三場策問臺灣事宜一道於地方情形事勢毫未通曉乃茫昧命題殊為悖謬其餘各省亦未盡當爾等將各省呈覽題目及題名錄詳加檢閱若有悖謬最甚者察出叅奏於是察看福建雲南河南三省第三場策問命題詞義多有未當均屬悖謬部議將主考王連瑛等分別各降級調用從之

三十七年吏部議覆湖廣道御史李登瀛疏言直

隸山東河南江南浙江江西陝西湖北等處舉人  
會試五科不中方許揀選又需次數年始得補用  
請酌減科分揀選使得及時効力應如所請直隸  
等九省舉人會試三科不中准其揀選知縣一科  
不中改授教職者以州學正縣教諭補用從之  
三十九年奉

諭旨此科中式舉人因有情弊為人指叅朕亦聞外議紛  
紜故行覆試以驗其實朕親命題特命皇子重臣侍衛

嚴加監試朕初謂必有不能終卷者及閱各卷俱能成  
文尚屬可矜至於落第者在外怨謗勢所必有焉能杜  
絕諸臣所擬三等以上者皆可觀有在三等朕拔置二  
等者亦有在四等朕拔置三等者四等果屬不堪著令  
黜革三等以上者仍令其會試

又吏部等衙門會議各省舉人吏部於每年四月  
十五日考試以知縣用並無去取亦無分職銜大  
小之處考試實屬具文應行停止俱照各省中式

年分名次註冊挨次選用從之

又吏部奏各省舉人就中書者人多缺少此內有願就知縣教職之人聽其具呈改注仍以科分名次序選八旗教習期滿以知縣用亦照舉人例停其考試照咨送年滿日期註冊與舉人較年月先後序選漢軍舉人無銓用之處今酌議於舉人班次內每選過三班後選漢軍舉人一人從之

定開列試差人員各省正副主考除應行開列外

將侍郎學士京堂翰林科道部屬等官由進士舉  
人出身者無論已未典試通行開列

又奉

諭旨今科鄉場曾令宗室考試宗室朕數加恩何患無官

嗣後停其考試

又准冒籍自首免罪除入籍二十年以上進學者  
照例不議外凡在京冒籍舉人貢監生員以部文  
到日為始限兩月內具自首禮部查明改歸原



籍肄業如過期不准行仍照例黜革其出結等官亦於兩月內檢舉過限者仍照定例處分嗣後凡有假冒籍貫品行不端者或被告發或被糾叅查審明確即行黜革仍交刑部又定中式舉人有冒籍者處分送考官宛大兩縣審音不詳亦如之康熙四十年改粵西冒籍舉人著歸原籍六十年議直隸冒籍進士舉人准其自首又議冒保定等衛籍者治罪又議令直隸中式舉人取具同鄉京官

印結雍正六年議准外省貢監赴京闈者取具本籍地隣甘結加地方官印結十一年定滿洲漢軍  
蒙混考試之禁乾隆三年議准包衣人員有投充  
庄頭子弟隸內務府管轄編入上三旗者又有舊  
漢人在內管領下及五旗王公所屬包衣旗鼓佐  
領內者此等原係漢人因由滿洲都統咨送每有  
在滿額內中式者悉行改正并飭嚴行禁止

又奉

諭旨考取舉人進士特為得人耳若或行賄夤緣而得之則出身之本源不清而欲冀他日之為忠臣良吏得乎今朕意欲凡係大臣子弟另編字號令其於此中較閱自必選擇其文之優劣大臣子弟既得選中又不致妨孤寒之路經九卿議覆嗣後直隸各省鄉試在京三品以上及大小京堂翰林科道吏禮二部司官在外督撫提鎮及藩臬等官子弟俱編入官字號另入號房考試各照定額每十卷民卷中取九卷官卷

中取一卷不必分經其副榜亦照此算取若各省鄉試官員子弟或止數人者不必另編官字號雲南四川貴州廣西四省在監鄉試亦編入南監內俱一體分別編官字號照額取中會試滿合字號南北字號亦編官字號每二十卷取一卷雲南等四省中額仍照現例行不另編官字號各項監生有願在監入場者俱由國子監錄取責令祭酒等力行考課之法考課不缺者准其入場照例分別

南北官民卷其願在本地鄉試者與監生一體分別官民卷取中從之旋停止會試官卷雍正元年覆准官卷內佳文不敷中額以民卷佳者補之七年議准有本係官卷而已經出繼者不准編入官號十三年議准貴州編設官號如例

四十年禮部奏順天鄉試副榜額中二十六名請分定直隸生員貝字號內中十六名南北監皿字號內各中五名從之

四十一年增浙江省鄉試中額十二名照江南例  
共八十三名並增同考官三員從巡撫趙申喬請  
也

又增湖廣省鄉試中額十三名從總督郭琇請也  
又增順天鄉試中額八旗滿洲蒙古三名漢軍一  
名順天等八府十名國子監貢監生八名奉天一  
名宣化一名從順天府尹錢晉錫請也

又江蘇巡撫宋犖疏言江南文闈同考官舊例用

十二員今酌增四員以重衡文之典從之

又定鄉會五經中式例先是順治二年以士子博雅不在多篇停五經中式至康熙三十六年京闈鄉試有五經二卷

特旨授為舉人後不為例至是禮部議本年鄉試監生莊令與俞長策試卷作五經文字與例不合奉

諭旨五經文字若俱浮泛不切自不當取中若能切題旨文理明順一日書寫二萬餘字實為難得莊令與俞長

策俱著授為舉人准其會試嗣後作五經文字不必禁止作何定例著九卿詹事科道議奏尋議嗣後鄉會試作五經文字者應於額外取中三名若佳卷果多另行題明酌奪五經文字草稿不全免其貼出二場於論表判外添詔誥各一道頭場備多頁長卷有願作五經者許本生稟明給發從之五十年增五經中額順天二名外省一名會試增中三名五十六年停止雍正二年議准每額中十九名加中



五經一名

四十三年禮部議覆提督湖廣學政潘宗洛疏言  
湖廣各府州縣熟苗中有通文藝者准與漢民一  
體應試應如所請從之

四十四年奉

諭旨內廷供奉諸翰林雖皆善書但朕勤心典籍卷帙繁多見供奉人員繕寫不給爾等出示傳諭安徽江蘇浙江舉貢生監等有精於書法願赴內廷抄寫者報名考

試旋考試浙江舉貢生等詩字以顧祖雍顧寧遠二人  
記名考試蘇州舉貢生等詩字以汪泰來等五十  
三人記名考試江寧舉貢生等詩字以錢榮等五  
人記名嗣奉

諭旨南巡考取貢監生生員准其一體順天鄉試至五十  
三年准太醫院及各館應舉生監亦俱准錄送鄉  
試雍正元年覆准候補天文生及補用天文生之  
監生生員俱令入四字號鄉試

又兵部議覆兩廣總督于成龍疏言土司子弟中有讀書能文者注入民籍一同考試從之

五十年增各省鄉試中額先是順治十七年奏減直省鄉試中額之半嗣後屢有加增至是

上以各省讀書士子日盛鄉試中額酌令加增加順天生員貝字號十八名南北監生四字號十三名滿洲蒙古四名漢軍二名江南浙江湖廣各十六名福建十四名江西十五名山東河南各十二名山西

陝西各十名廣東四川各十一名廣西八名雲南  
九名貴州六名其副榜分經取中之處俱照名數  
計算永為定例至康熙五十八年江西解額著照  
浙江湖廣例取中

又寬鄉會試發榜期限先是順治二年定闈中閱  
卷限程自分卷以至揭曉約可半月至是年順天  
鄉試發榜過期為監試御史叅奏得

旨直隸各省生員舉人增額既多赴試者較前倍衆考試

官不能細心徧閱草率錄取以致遺失佳卷此皆因出榜之期太近故耳如出榜多展數日則考試官得以詳閱試卷不致有遺珠之嘆下九卿議奏尋議嗣後會試揭曉寬於三月十五日內鄉試揭曉大省寬於九月十五日內中省寬於九月初十日內小省寬於九月初五日內直隸江南浙江鄉試人數倍於他省照會試例加用房考二員限期既寬主考官閱房考官之薦卷外餘卷亦令徧閱庶不致遺失佳

卷從之

五十一年量增雲貴廣西會試中額各一名其江浙人士冒北籍者准其自首奉

諭旨趙申喬題請雲南貴州廣西三省中額量增數名今覆試中式進士可令趙申喬將所取三省備卷舉人亦帶來考試邇來浙江江南人冒直隸等處北籍及代人考試者甚多十三省語音朕悉通曉觀人察言即可識辨著出示徧曉中式進士等其中有冒籍替代等項俱

赴部自首覆試之日朕前亦許面奏倘隱蔽不發朕一查出悔之無及

又奉

諭旨今歲考取進士額數無多止一百六十一人揀拔庶吉士者不過四五十人其餘俱挨次選授知縣縣令與民切近有刑名錢穀之責未登仕以前如不知事宜典禮則登仕之後於地方民生事務無有裨益今歲考中進士除揀選庶吉士外其餘勿使回籍俱交與禮部選

翰林內學優品端者數人派令教習文藝從事典禮如有修書處率同修書又考中武進士皆以叅將遊擊守備等項員缺補用此等俱有約束兵丁整飭營伍之責未補官以前不可不先令其學習嗣後考取武進士亦著勿回原籍見在年滿千總皆分撥八旗武進士等亦著分撥八旗隨圍學習行走

又禮部奏直隸各省舉人貢監生員李長庚等呈稱康熙五十二年恭遇



皇上六旬萬壽普天胥慶率土同歡恭請特開

萬壽鄉會科以彰千載一時之盛應如所請照順治丙戌  
科特行鄉試丁亥科特行會試例於二月內舉行  
鄉試八月內舉行會試以愜輿情以彰盛典得

旨造就人材實為美事著如所議行

又奉

諭旨近見直隸各省考取進士額數或一省偏多一省偏  
少皆因南北卷中未經分別省分故取中人數甚屬不

均今文教廣敷士子俱鼓勵勤學各省赴試之人倍多  
於昔貧士自遠方跋涉赴試至京每限於額多至遺漏  
朕深為軫念自今以後考取進士額數不必預定俟天  
下會試之人齊集京師著該部將各省應試到部舉人  
實數及八旗滿洲蒙古漢軍應考人數一併查明預行  
奏聞朕計省之大小人之多寡按省酌定取中進士額  
數考取之時就本省卷內擇其佳者照所定之數取中

五十二年奉

諭旨主試之人衡文取士必當除去偏見拔選佳文若以偏見閱文則人心不服上科京闈鄉試雖無交通賄賂之弊而所中之卷不佳且有少年稚子僥倖入彀即題目應出各種乃得佳文今歲京闈鄉試所出七題皆係理致士子偶有一二語合主司意者遂獲登錄其同考官選文薦閱又皆揣摩主司之意場中士子未能各展其長而實學之人多擯不錄者職是故也

又吏部議覆內閣中書奉

旨用進士出身之人嗣後滿中書缺出應論旗分於進士  
內挨次擬用如無進士將舉人挨次擬用漢中書  
缺出用留京教習進士其從前進士舉人候選中  
書者停其選授改歸知縣教職等項用其候選中  
書不由進士舉人出身者對品改選以鑒儀衛經  
歷詹事府主簿等缺用從之

又

殿試讀卷官大學士等遵例以試卷十本進

呈

上閱至第二卷曰此卷必係南省人命拆視之果然

上一一閱卷畢

諭大學士等曰爾等大臣多係進士出身深知文字凡文章書法各有所習一覽可知朕適閱第二卷未及拆封早知為南省人昭然不爽聞來京應試之人將伊等所作文字各處投送其應開考試官悉令過目以博己之聲名以求人之採取爾等場中閱卷當一秉虛公畧無

私意始稱厥職至五經四書俱係聖賢之言考試出題專意取冠冕者則題目漸少士子易於揣摩甚有將不出題之書刪而不讀尚得言學問乎經書內有不可出之題試官自然不出其餘出題之處須以各種題目試之則懷才實學之士自無遺棄矣

又奉

諭旨文武考試雖曰兩途俱係選拔人才而習文之內亦有學習武畧善於騎射者習武之內亦有通曉制義學

問優長者如或拘於成例以文武兩途不令通融應試則不能各展所長必至遺漏真才嗣後文生員舉人內願就武場武生員舉人內願就文場應各聽其考試中式者造入新冊不中式者仍各入文武原冊不准再考

五十三年奉

諭旨教官有教養士子之責員缺甚屬緊要嗣後掣選教官者應取至京師令大臣面試方可補授其補授州同亦應取至京師令九卿面試補用有出身不明者著革

退嗣於康熙五十七年

諭教官不必來京惟令督撫考試可用者補用年老不堪者罷之

又九卿議中式舉人俱到府丞衙門填寫親供與試卷一同送部磨勘如逾限不即送部禮部題參照例議處從之

五十四年

勅科場毋出熟習擬題令同考官互相糾察并停止五經



中式先是康熙五十二年以近科鄉會試多擇取  
冠冕吉祥語出題每多宿構倖獲降

旨申飭茲復奉

諭旨科場出題關係緊要鄉會經書題目不拘忌諱斷不  
可出熟習常擬之題朕常講易及修定天文律呂算法  
諸書爾等考試官斷不可以此諸書出題表題亦不可  
出修書賜書等類不然則人皆可擬題倖進實學何由  
而得再房考亦屬緊要若房官有弊主考亦無如之何

今可將一房卷令不同省房官二人同閱如一人有情  
弊發覺後二人並坐則各知畏懼互相糾察再五經中  
式甚屬無益十七八歲之幼穉皆能之不過手敏多寫  
字耳殊無實學著停止雍正元年覆准考官若仍出熟  
習擬題交與該部議處  
是年

賜內廷行走舉人梅穀成一體殿試

五十六年禮部奏請順天鄉試正副考官及同考

官將九卿舉出官員職名開列奉

諭旨棘闈弊端甚多此番房考官即在所開正副考官內  
每房派二員其各省人著叅雜派出每房所派二人不  
得派同省之人

五十七年吏部奏貢監赴臣部考職者應交與九  
卿公同考試如有試卷與親供筆跡不同者察出  
從重治罪從之

又奉

諭旨考試月官令作八股時文大都抄錄舊文苟且塞責  
嗣後不必作八股時文止令寫履歷以三百字為限觀  
其書法妍醜文理工拙則人之優絀自可立見矣

五十八年禮部議覆江西巡撫白潢疏言江西鄉  
試入場士子多至一萬二千餘人而中額比浙江  
湖廣少九名請照浙江湖廣額數取中九十九名  
應如所請從之

六十年奉

諭旨此番應試之人有學問優長不得中式以致抱屈者朕亦無從而知即有人奏聞亦難深信如舉人王蘭生學問南人中或有勝彼者若直隸人則未能及之前周易折中性理精義朱子全書魏廷珍王蘭生等在朕前晝夜校對五年不遺一字讀書人少全讀性理者王蘭生甚為精熟學問亦優屢試未中或文章不佳抑別有故耶再滿洲舉人留保學問好滿洲蒙古漢軍中軍有及者即翰林中諒如彼者亦少此在朕前行走之人朕

深知之非屬偏向也王蘭生留保俱賜進士一體殿試

皇朝文獻通考卷四十八

欽定四庫全書

皇朝文獻通考卷四十九

選舉考三

舉士

雍正元年奉

諭旨直省主考官俱係

皇考選用之人必能自好是以特簡為主考官務秉公考  
取學問優長之士果能不徇私情聲名無忝則不但無



負朕之選用亦不負

皇考愛養之恩矣回京之日朕自加陞擢如有徇私之處  
經朕訪聞定行從重治罪決不寬貸

又選新進士為內外官學教習吏部等衙門議定  
新進士除選取庶吉士外揀選學問好者令為內  
外官學教習年滿遇月官扣缺補用餘令回籍候  
選至是年六月又定三年期滿照科分名次以中

書補用

又總理事務王大臣奉

諭旨八旗滿洲等除照常考試漢字秀才舉人進士外在  
滿洲等繙譯武藝亦俱屬緊要應將滿洲另繙滿文考  
試秀才舉人進士武秀才舉人進士之處爾等會同該  
部作何考試額數多少等處定議具奏尋議滿洲蒙古  
能繙譯者三年之內考取秀才二次舉人一次進  
士一次每遇考取秀才之年吏部行文翰林院各  
部院衙門將滿洲翰林侍讀郎中等官內由清漢

字出身精通繙譯者咨送吏部開列具題

欽點學政一員其考試之童生八旗都統備造旗分佐領三代履歷年貌清冊咨送禮部轉送兵部考試馬步箭冊送學政於貢院內考試將四書直解限三百字內為題繙滿文一篇其繙譯精通者聽考官選取考試之後將卷冊交送禮部該員仍回本衙門辦事其鄉試會試另立一場於子午卯酉年二月鄉試辰戌丑未年八月會試鄉試禮部照例咨

取滿洲由清漢出身之大臣官員職名併漢大臣  
官員職名開列具題

欽點滿漢正副主考官各二員滿同考官四員禮部滿洲  
侍郎一員為監臨官會同順天府提調官管理鄉  
場內外之事其應考之人不拘滿漢字貢監生員  
其現任筆帖式能繙譯者俱照例考試馬步箭咨  
送入場頭場將四書解義易經解義書經解義性  
理精義孝經衍義大學衍義古文淵鑑資治綱目

等書限二百字內出題三篇二場漢主考官或判  
論或表策自作二篇為題三場於入場後取現到  
通本一道為題其所用通本鄉試命順天府官赴  
通政司親領封固親身送至貢院門首交提調官  
轉送內簾監試主考官公同開閱會試亦照此例  
由禮部官賫送其現在文舉人能繙譯者亦准與  
繙譯會試

殿試題目或於古文及律詩詞賦等文內由內閣奏

請恭候

欽命其鄉試於雍正二年十一月舉行會試於雍正三年

二月舉行

殿試於三月舉行

奉

諭旨國家掄才大典首重試官主考憑房考閱薦之文定其去取則一榜衡鑒之當否係於分校諸臣之賢不肖亦匪輕矣近科以來

皇考慎重闢門籲俊之典於順天鄉試及會試房考官慮  
其人邪正不一特命每房各用二人同閱試卷使之互  
相覺察彼此鉗制用意良為周密但法久弊生一房兩  
考官豈皆遇秉公持正之人設有一狡黠者叅雜其間  
即為賢者之累况兩人或皆不肖則朋比作奸為弊更  
甚嗣後仍著照原定科場條例各房止用一人校閱其  
責既專其功罪亦難推諉務俾鎖闈清肅悉拔真才以  
仰繼

皇考旁求俊乂之志爾部即遵諭行

又奉

諭旨此番鄉試落卷著大學士王頊齡刑部尚書勵廷儀署吏部侍郎內閣學士史貽直戶部侍郎張伯行李周望兵部侍郎阿克敦副都御史李紱同南書房翰林檢閱如人不足於翰林院編檢內揀選十員同閱再此番係雍正元年特恩加科士子有因迴避不曾應試者殊屬可憫即令派出大臣擬題奏請候朕點出於內閣考



試尋經考試取中迴避卷四名落卷二名

又奉

諭旨孝經一書與五經並重蓋孝為百行之首我

聖祖仁皇帝欽定孝經衍義以闡發至德要道誠化民成俗之本也鄉會試二場向以孝經為論題後改用太極圖說通書西銘正蒙夫宋儒之書雖足羽翼經傳豈若聖言之廣大悉備今自雍正元年會試為始二場論題宜仍用孝經庶士子咸知誦習而民間亦敦本勵行即

移孝作忠之道胥由乎此

又奉

諭旨各省鄉試房考凡州縣官由科甲出身者止許入闈  
一次夫考官以秉公精鑒識拔人才為主何論曾否入  
闈嗣後凡遇鄉科各省督撫臨場調齊科甲出身之員  
不論已未分房監臨試以時藝一篇其文理優長者為  
內簾房考荒疎者供外場執事則分校得人而佳文盡  
拔矣

分湖北湖南兩闡鄉試先是湖南士子赴湖北鄉試必經由洞庭湖六七月間風浪不測間有覆溺之患或至士子畏避險遠裹足不前特奉

諭旨於湖南地方建立試院每科另簡考官俾士子就近入場永無阻隔之虞明年二月為鄉試之期湖南巡撫若能於二月之前預備場屋則於明春即分湖北湖南兩闡考試至於湖廣通省取中原有定額今既分兩闡其取中之數應如何分別之處著湖北湖南督撫定議

尋議定楚省分闈湖北中式五十名副榜十名湖南中式四十九名副榜九名武舉各二十五名

又禮部奏言請定今科取中進士名數得

旨今科進士照朕所定一百八十名之數取中仍降旨與總裁官朱軾張廷玉此外不拘省分不限額數如有佳卷選出另行具奏

增廣東省鄉試舉人中額六名武舉中額四名從署廣東巡撫年希堯請也

總理事務王大臣等奉

諭旨今年殿試天氣已寒諸貢士若照舊例在丹墀對策  
恐硯池冰結難於書寫著在太和殿內兩傍對策再傳  
諭總管太監多置火爐使殿內和煖諸貢士得盡心作  
文寫卷

又奉

諭旨向來庶吉士學習清書散館之後每至荒廢殊為可  
惜嗣後清書散館之翰林不可令其荒廢今年新科進

士選拔庶常朕意學習清書者少派數人令其盡心學習務期通曉散館後亦不可荒廢或在翰林或在部曹即令與滿員一同繙譯如此方實有裨益新科進士於引見之前朕欲先行考試知其學問再行引見選拔庶人才不致遺漏目今天氣寒冷一應仍照殿試預備考試題目朕將詩文四六各體出題視其所能或一篇或二三篇或各體俱作悉聽其便

又禮部議覆御史田嘉穀條奏各省學政科考生

員舊例用四書題文二篇請增用經題文一篇以  
崇經學如遇三冬日短減去四書文一篇應如所  
請從之

又吏部疏奏舉人揀選知縣每逾三十年不克及  
時試用除現在已經截取赴部聽其照例銓選外  
其餘無論已未揀選之員除本科外應行令直省  
督撫每於鄉試事竣會同主考官秉公驗看凡年  
力精壯克勝吏治者給文赴部銓選其年老及才

具平常者雖已經截取俱准於本籍具呈改就教職歸班銓選從之

又奉

諭旨昨引見新科進士名單內有用點記名者三十員以知縣即用尖圍記名者十七員年力尚壯傳問伊等有願在各館効力及在內官學教習者令各自陳明若行走勤謹學問好者朕仍拔為翰林

二年



上親詣太學釋奠加增國子監鄉試中額十八名五經加中四名直隸各省分別加增五經中額

又吏部議奏內閣漢中書員缺專用景山教習之進士補授每致辦事乏人嗣後請照舊例以願就中書之進士舉人銓補內閣酌量考取擇其字畫端楷者分班選用從之

又奉

諭旨遠省州縣員缺舊例部選月官領憑赴任每至需遲

累月甚而懸缺日久署印屢易其官以致貽誤地方不  
少朕意將揀選舉人選期尚遠者挑選命往各省聽候  
缺出委用署事至應選時仍來京候選庶遠省署事不  
致乏人於吏治有益下部定議尋議會試後下第舉人  
吏部揀選引

見發往雲貴川廣五省委署試用如果才守兼優著有實  
效該督撫保題於本省補用平常者咨部請

旨有情願會試者聽從之

又禮部奉

諭旨鄉會試為掄才大典內外簾官子弟理應迴避但跋涉數千里志切觀光既至京師不得與試深為可憫朕於上科特降諭旨另行考校然此只可暫行不便著為定例今科凡官員入闈者其子弟著一體應試將試卷另行進呈朕派大臣校閱遴選

又奉

諭旨聞中謄錄試卷弊端甚多其有賄囑者則書寫精工

否則潦草舛錯致誤佳文著知貢舉及監試御史嚴行  
申飭其謄寫不工者必重加責懲令其重寫併令對讀  
官員嚴飭各生悉心校對勿使字畫錯誤倘有外簾官  
失於查察日後發覺將該管官一併嚴加議處

又

命會試舉人分別道里遠近賞給歸途路費雲南廣東廣  
西貴州四川五省每人銀十兩福建浙江江南江  
西湖廣陝西六省每人銀七兩直隸山東山西河

南四省每人銀五兩

又

命會試及順天鄉試元魁三場試卷繕錄進呈

又奉

諭旨考試繙譯舉人不必分作三場只須一次考試一日  
一夜量其所能章奏一道或四書或五經酌量出一題  
其優劣便已可見此考試並無漢文不必派漢大臣再  
考試舉子俱係八旗內人其繙譯好者衆所共知即字

蹟亦最易識認伊等試卷應行謄錄著於六部各衙門  
善書之筆帖式內酌量足用選取令其謄寫選中之卷  
進呈時再定額數仍寫備卷呈覽其分校及巡察等員  
亦俱照文鄉試例派用尋議定繙譯舉人作一次考試  
或用章奏一道或於四書五經內酌出一題選取  
各部院衙門筆帖式等令其謄錄其堪中式之卷  
挑選奏進時再行定額仍選備卷數本呈

覽考試官員於滿大臣內派正考官一員副考官一員部

院官員內派同考官四員其餘應行事宜俱照文鄉試例本年甲辰科繙譯鄉試取中滿洲繙譯舉人九名

又禮部工部國子監奉

諭旨進士題名之典始於唐時進士榜後於慈恩寺塔下題名立碑自宋明以至我朝皆建碑於太學按其甲第先後勒載姓名籍貫於上所以重科名也今太學聖廟戟門外所立本朝歷科題名碑自順治丙戌科起

至康熙戊戌科而止稽之會典諸進士釋菜後禮部題請工部給建碑銀一百兩交與國子監立石題名康熙三年輔政大臣裁省自後每科諸進士各自捐貲立石我國家振興文教凡鄉會試動用帑金數萬朕即位之始即開恩科誠以科目一途實關用人取士之要題名之典豈宜缺焉著工部動用正項錢糧令國子監將雍正癸卯甲辰兩科題名碑速行建立康熙辛丑科亦宜補建嗣後每科仍照舊例題請庶士子觀覽此碑知讀



書登榜之榮益勵其潛修上達之志爾該衙門即遵諭行

又增福建省鄉試中額四名從福建巡撫黃國材請也

三年奉

諭旨前各省正副主考朕皆視其人謹慎者派往並未試其文藝間有不能衡文者此皆由中式之後荒疎年久故耳著將應差委之翰林由進士出身各部院官員查

奏朕試以文藝差委旋遵

旨將翰林院及進士出身官員人數查明具奏召集於

太和殿試以四書題文二篇

親定甲乙封貯內閣以備鄉試差遣次年將考試取定人

員書名牙籤盛以金筒每屆按省分差之期設黃

案於

午門外

命大學士同禮部官掣籤唱名恭請

欽定正副主考七年仍行

御試分別記名暨十三年鄉試主考皆如之

又禮部議覆左通政陳良弼條奏八旗漢軍筆帖式貢監生員官學生亦有學習繙譯者請照滿洲蒙古例一體考試應如所請嗣後三年之內考取秀才二次舉人一次進士一次其取中額數視人數多寡臨期請

旨欽定從之

又吏部等衙門議覆原任川陝總督年羹堯疏言  
陝西寧夏等衛所新經改設郡縣請分設寧夏西  
寧涼州甘州四府一年一貢靈州三年兩貢寧夏  
寧朔二縣各兩年一貢中衛縣三年兩貢西寧武  
威平羅碾伯古浪高臺永昌鎮番山丹平番張掖  
等縣各兩年一貢照寧夏例行應如所請從之  
又領侍衛大臣奉

諭旨爾等俱係勲舊大臣之子孫孰不當為國家効用但

今擇人任用大臣等之子孫內能勝任者不可驟得今大臣之子及散秩大臣侍衛等之子內爾諸臣有知其善者即行舉奏縱不深知訪問於章京護軍校等如得其人亦行舉奏以備朕之試用

又吏部議覆吏部左侍郎查郎阿奏言直隸州州同州判雖係佐貳現管逃盜等案不便以捐納貢監補授管轄屬縣請舉人銓補州同恩拔副榜貢生銓補州判應如所請從之

四年奉

諭旨國家設學校以儲養人才鄉會廷試拔其尤者而用之即古選士造士之遺意也但士子作文有一日之長短縱使主司公明搜羅豈能無遺况去取惟憑文藝其人品之高下才能之優絀無由得知每有出羣拔萃之才屢試不售即或晚得一第而年力衰邁不堪為國家任使朕思各省學政奉命課士黜劣舉優係其專責嗣後學政三年任滿將生員中實在人品端方有猷有為

有守之人。大省舉四五人。小省二人。送部引見。朕親加考試。酌量擢用。現在報滿各學政。即遵照薦舉。其到任未久。如有所知。亦即舉出。夫一省而舉數士。不可謂無人。學政巡歷各府三年之久。日與士子相親。考文察行。不得謂不知。但能虛公衡鑒。所舉必得其人。且風聲所樹。凡讀書士子。必皆鼓舞振興。力學敦行。求為有用之儒。於士習人才。大有裨益。其各實心奉行。毋得苟且塞責。如有徇私冒濫等弊。必嚴加治罪。

又以繙譯鄉試添增漢軍照文鄉試例滿洲蒙古編滿字號漢軍編合字號

又定江西鄉試內簾書經房考舊用二員經撫臣裴緯度奏卷多房少請酌添書經房同考官一員從之

又吏部議奏國子監漢字助教員缺將舉人副榜按科分每旗咨取十人併將由舉人副榜出身之俸滿筆帖式每旗咨取五人清文助教員缺於清



文俸深筆帖式每旗咨取十人考取註冊不限旗  
分各按名次補用論俸陞轉從之

又奉

諭旨士子讀書制行之道首在明經其以五經取中副榜  
者必有志經學之士著將今年各省五經取中副榜之  
人俱准作舉人一體會試再今科各省所中副榜內有  
兩次中副榜者亦准作舉人一體會試此係特典後不  
為例

又定考驗就教貢生例各省恩拔副貢生內已就  
教職者各省學臣於歲科兩考事竣會同巡撫與  
挨貢一體驗看造冊送部銓選年老者以原品休  
致

五年吏部奉

諭旨會試舉人著爾部揀選引見併問九卿將所知者舉  
出再舉人內有伊等同鄉素日推服之人亦著舉人公  
舉或數人共舉一人或十數人共舉一人俱將姓名註

明務須有猷有為有守之人方可推薦不得冒濫

又奉

諭旨士子讀書應試須專心講習方可望其成就八旗舉  
人生員內在護軍執事人行走者朕念其用度艱難恐  
致分心是以於雍正元年特加殊恩令其退回仍賚給  
錢糧養贍俾得專心讀書勉勵上進庶國家可收得人  
之益今已三年有餘其中或有年力衰邁及不肖之人  
徒領錢糧無志上進虛糜國帑者亦未可知若不加考

課分別勤惰無以鼓勵人才著於會試後將八旗滿洲  
蒙古舉人生員漢軍舉人查明人數請題考試分別等  
第驗其優劣

又奉

諭旨朕以今年閏月節氣稍遲二月天寒故將會試日期  
改至三月但目今天氣尚覺寒冷若再改期又恐舉子  
盤費無多艱於旅食今照舊於初八日入場著曉諭各  
舉子俱許攜帶手爐以溫筆硯皮衣及厚綿衣服俱許

穿進但不得乘機懷挾以滋弊端場內茶飯著供給官  
加意預備朕另派大臣照看料理令早晚給與薑湯并  
按名給發木炭以資其用

又奉

諭旨今科選拔庶常應如何簡選考試務得人材以濟實  
用著會議具奏尋議進士選拔庶常原屬儲才大典必  
得其學問素優才品兼著之士方可選列清華查

雍正元年癸卯科

殿試後集諸進士於

保和殿

御試並令九卿各舉所知雍正二年甲辰科照前舉行今  
科進士亦應詳加考試仍令內閣九卿確行保舉  
其考試擬用論詔奏議詩四題或作一二篇或諸  
體全構聽其各展所長屆期

欽點大臣閱卷進呈其進士內有彼此熟悉素為衆所推  
服者亦令公同舉出伏候

親加選定從之

又奉

諭旨外省鄉試房考舊例皆用現任知縣入闈朕思知縣身為民牧地方政務甚繁入闈動經數月諸事或至遲誤朕意欲將外省房考之例斟酌更定或於隣省中舉人進士之在家候選者臨期調取數十人交與監臨之督撫秉公掣籤令其入闈分校著九卿詳議具奏尋議順天鄉試仍照舊例其外省鄉試飭令所屬地方

官將在籍之進士舉人文行素優者送督撫衙門  
驗看以備隣省調取大省十八房取用三十名中  
省十四房取用二十五名小省十二房或十一房  
取用二十名十房取用十八名隣省咨文到日遣  
官伴送人給路費銀三十兩臨期掣籤得內簾者  
入闈分校餘令回籍至外簾之收掌等五所官仍  
於本省府州縣佐貳等官內委用從之

分設八旗官學順天學政孫嘉淦條奏請整飭八



旗官學以育人材嗣後挑選官學生務擇聰明俊秀子弟考課分習清漢書每旗給官房一所為學舍以貢生五人為教習派定所教人數優其廩給專其訓導又不時稽查勤惰期滿分別議敘從之改定奉天廩生出貢例禮部議覆奉天府丞須洲疏言奉天府學民籍廩生一年一貢似覺太速請二年一貢滿字號廩生五年一貢似覺太遲請三年一貢再

盛京幅幘廣闊滿漢生員散處千里之內總屬府學  
教官管轄耳目難周請令查明居址撥歸相近縣  
學督課俱應如所請從之

又禮部奉

諭旨直省拔貢舊例十二年題請舉行一次後因各省學  
政不能秉公選取國子監未便照例請行於雍正元年  
時特行一次朕思各州縣每年歲貢較其食廩淺深挨  
次出貢內多年力衰邁之人欲得人材必須選拔著各

省學政於科考時照例府學拔取二名縣學拔取一名  
寧缺毋濫務取學問優通品行端方才猷可用之才令  
其來京朕將親加考驗令入國子監肄業如有學問荒  
陋人品不端才具庸劣者將學政嚴加議處嗣後六年  
選拔一次國子監屆期題請候旨

六年刑部尚書勵廷儀條奏請除監生考職倩代  
頂冒之弊得

旨各省監生每於考職之時或憚於跋涉或不諳文理託

在京之親戚朋友代為應考而本人安坐原籍濫竊職銜此等陋習相沿已久是以數年來朕特遣大臣專司考職之事及後訪察知考試之臣亦只能校閱文藝不能除假冒之弊故上年考試後朕令將一千一百餘人通行引見彼時伊等自知頂冒情虧不敢報名引見者九百餘人俱經降旨革退其引見之二百餘人朕以為皆係正身又見其中有人材可用者因揀七十餘人交部即用或令外省督撫試用且有加恩用至知縣知州

等官者近聞此即用人員內竟尚有頂冒之人似此敢於欺罔可謂愍不畏死者矣今朕開恩准其自行出首若代考得官之人遵旨出首朕酌量寬減其罪其託人代考者情罪較輕若遵旨出首但革去監生不治其罪倘仍前隱匿不首一經察出將與者受者即行正法其從前歷來考職監生有代考得官者亦照此例行

又

敕浙江士子照舊鄉會考試先是雍正四年停止浙江鄉

會考試至是奉

諭旨浙江士習澆薄朕為世道人心計不得不嚴加整理  
今二年以來李衛王國棟先後奏稱兩浙士子感朕訓  
誨之恩省愆悔過將舊日澆凌奔競之習痛自改除可  
稱士風丕變前年朕原降旨浙人秉性聰慧既知讀書  
必明大義非如强悍執滯之難於感化者一經指示則  
醒悟亦必最捷不出二三載可以望其自新今果然矣  
明年即屆鄉試之期浙省士子准其照舊鄉會考試以

示朕訓俗牖民樂聞遷善之至意

又

敕各省保舉貢生生員以教職用者俸滿應陞之時不得  
別行陞轉

又禮部奉

諭旨各省考取拔貢原欲遴選儒生以宏教育向來之例  
俱於現考一二等生員內選拔文行兼優者但恐作文  
有一日之短長而文理平通不列優等者其人或品行

端方才識練達足備國家之用亦未可定嗣後著各省  
學政不必拘一二等之生員俱准收考酌量試以時務  
策論其人果有識見才幹再訪其平日品行端方即正  
考未列優等亦准選拔則文行兼收可以昭國家廣攬  
人材之典

七年宗人府奏宗學教習期滿之舉人貢生請予  
議敘得

旨宗學教習於期滿之時自應加恩議敘除舉人係應選



知縣之員照原議銓選外其貢生等善於訓課未必嫻於吏治若一概用為知縣不但於吏治無益而本人不能辦事致干叅處亦非所以成全之也凡各處教習之貢生等著於期滿之時該管衙門帶領引見或用為知縣或用為教官候朕頒發諭旨因材器使將此通著為例

又奉

諭旨考官專司衡文之任必須學問明通者始能鑒別不

與雍正三年曾將在京科目出身應充正副考官之員  
通行考試分別等次記名於雍正四年掣籤命往各省  
使典試事今已越三年從前考取人員其中陞遷外任  
及告假回籍者甚多即有在京者其所學或以日久漸  
荒而前此之未曾入選者今用四年之功文藝未必無  
所進益且陸續新到之員亦復不少著照雍正三年之  
例通行考試俟朕分別記名以備持衡之任有不願就  
試者亦聽其意

又禮部議覆雲貴廣西總督鄂爾泰疏言貴州一  
省原轄十一府四十州縣每科鄉試額取文舉人  
三十六名五經二名武舉二十名近於四川湖南  
兩省內將十三州縣改隸貴州赴試人數較多請  
增貴州鄉試解額加中文舉人六名共四十二名  
武舉三名共二十三名庶不致人多額少黔省既  
經議加則四川湖南應行議減請將四川解額文  
舉人減四名武舉人減二名湖南解額文舉人減

二名武舉人減一名應如所請從之

又奉

諭八旗貢監生員已經考取小京官筆帖式者准其與舉子等同與鄉試

又奉

諭旨各省拔貢聞已陸續來京伊等既不能應本省之鄉試則當准其應試北闈俾得與觀光大典凡拔貢之有貢單者俱著該堂官咨送順天府令其應試再修書各

館內從前有外省生員在館効力者若情願入場考試  
著取具同鄉官印結送順天府亦准入場

又定漢軍義學肄業子弟如有文理精通考繙譯  
者不拘閒散俱准赴吏部考取筆帖式其文理粗  
通弓箭可造者聽其在本旗挑補領催兵丁三年  
之內教習勤謹者將教習人員分別議敘

又遴選廣東連州生員

欽賜舉人四名時署廣東巡撫傅泰疏言廣州府理瑤同

知朱振基於前任連州知州任內奉祀逆賊呂留良牌位據連州生員陳錫等合詞呈首

上以連州生員陳錫等深明大義不為邪說所惑據實出首令將今年該州應試完場之舉子交與該省學政秉公遴選學問優長者賞作舉人一體會試如今科所取副榜內有連州生監亦准作舉人

又奉

諭旨大學士尚書侍郎都御史副都御史各大員有子在

京闈及本省鄉試未經中式年二十以上者著各舉文理通順可以取中者一人開送內閣尋開列大學士蔣廷錫子蔣溥吏部尚書嵇曾筠子嵇璜都御史唐執玉子唐少游吏部左侍郎史貽直子史奕簪戶部右侍郎王廷揚子王鏐禮部左侍郎錢以塏子錢鏐禮部左侍郎鄂爾奇子鄂倫兵部左侍郎楊汝穀子楊綏刑部左侍郎繆沅子繆標工部右侍郎張大有子張鴻運侍郎署理倉場事務涂天相

子徐士炳副都御史王寵子王謝升等具奏得

旨俱賜舉人戶部侍郎劉聲芳子劉俊邦因病未應鄉試

亦准作舉人一體會試

又准八旗叅領處酌派筆帖式行走凡八旗文移  
稿案向由管檔領催繕寫伊等多係兵丁出身於  
滿漢文理不能通曉不無草率舛錯之處經給事  
中奚德慎條奏嗣後八旗監生生員官學生內有  
通曉滿漢文願在叅領處効力行走者令該都統



等按旗揀選滿洲每叅領下酌派二員蒙古漢軍  
每叅領下酌派一員授為貼寫筆帖式辦理一切  
檔案事件五年期滿該旗咨送吏部考試繙譯取  
中後以部院衙門筆帖式補用應如所請從之  
八年分派新進士於六部額外主事學習行走是  
年新進士除選拔庶吉士外曹繩柱係現任中書  
以六部主事用其馬丙等五十八名均奉

諭旨任六部額外主事上學習行走該部按各部司分多

寡掣籤分派具奏三年之後如能稱職該部堂官  
題補如不能稱職該部奏聞其內若果有才猷出  
衆明練政治之員於一年之後該堂官將情由聲  
明保奏帶領引

見請

旨此各部分行走之員俱照額外主事之例給與俸祿

又奉

諭旨今科外用進士著就伊等本籍地方掣籤派往交與

各該督撫分派藩臬衙門令其學習伊等中式之後原須候選數年始能得官今著學習三年委署試用一年約計四年之後題補實授與伊等候選之期相仿而又得學習吏治較之間居豈不大有裨益此三年內若該地方需用人員仍著奏請另行揀選命往不必於新科進士內遷就委用倘新進士中果有才具出衆平日熟練吏治不待學習者著該督撫格外委署題補即於本內聲明若才具庸常難以練習吏治情願改教者不拘

三年之期准其具題改補其學習之員每年公費若干該督撫於公用銀兩內酌量給與著行文各督撫知之

又吏部奉

諭旨向來各處鹽政弊端甚多難以清理是以定議於候選知縣內揀選命往彼時因人員不敷遂將監生捐職之人亦入於揀選之內聞有夬同鄉官出結而私相饋送者此風斷不可長嗣後不必用捐銜之人著將在部學習及留京之拔貢生令各堂官擇其為人謹慎有身

家可以辦事者保送吏部以備揀選

又各省選拔生員到京派大臣秉公考試分別等次內有湖北應山縣生員楊可鏡一卷文理荒疎經部議照例革去選拔奉

諭旨楊可鏡乃明臣楊漣之元孫昔順治四年楊漣之子楊之易為江南松江府同知遭提督吳勝兆之叛捐軀殉難凜然忠節此即楊可鏡之曾祖也朕思楊漣父子兩世忠義其後嗣子孫若稍能自立品行無虧雖文藝

不工亦當格外造就楊可鏡准作選拔赴國子監肄業  
仍著禮部帶領引見

又禮部議覆四川巡撫憲德疏言茂州羌民久列  
版圖載糧入冊與齊民無異請照例與漢民一體  
應試科舉出貢卷面不必分別漢羌額數憑文去  
取以廣樂育鼓勵之意應如所請從之

九年奉

諭旨看來蒙古旗下人能蒙古話及能以蒙古字繙譯者

甚少如是相沿日久蒙古文字并蒙古話必漸至廢棄  
宜令蒙古旗下人亦照考試滿洲繙譯生員舉人進士  
之例考取蒙古繙譯生員舉人進士在理藩院補用如  
有讀習漢書情願考試文生員舉人進士者令照常考  
試著在別部院補用如此則蒙古旗下人俱各奮發勤  
學蒙古文字並蒙古話不至廢棄而理藩院亦收得人  
之效著大學士會同理藩院議奏遵

旨議准八旗蒙古人等能繙譯滿洲蒙古文字者照考試

滿洲繙譯之例三年之內考取秀才二次舉人一次進士一次鄉會試與滿洲繙譯合為一闈滿洲應試舉子在東文場考試蒙古應試舉子在西文場考試滿洲蒙古合為一榜一同張掛考取秀才派蒙古學院一員鄉會試各添派蒙古主考官一員蒙古同考官二員俱由該衙門咨取各部院蒙古大臣官員職名開列具題

欽點考取秀才題目於清字日講四書內照漢文限三百



字為題繙譯蒙古文一篇鄉會試題目於清字日  
講四書內照漢文限三百字為首題再用清字奏  
疏一道為次題繙譯蒙古文二篇謄錄試卷於各  
衙門善書蒙古字之筆帖式內咨取派用其監臨  
提調監試等官於滿洲繙譯科具題

欽點毋庸另派其取中秀才舉人進士額數令考官挑取  
中式之卷並選備卷數本一并進呈請

旨欽定考取秀才於本年十月舉行鄉會試於考試滿洲

繙譯一同舉行雍正十年壬子科繙譯鄉試取中  
滿洲繙譯舉人十六名蒙古繙譯舉人二名

定滿洲教習選用例禮部奉

諭旨滿洲教習俱係旗人並無別項差使在館充數三載  
即得一官爾等當不時稽查分別優劣如果教導有方  
即當奏聞其不能稱職者亦應題叅今值酌定成例之  
初凡教習期滿作何補用之處著會同大學士等妥議  
具奏尋議滿洲教習三年期滿其行走勤謹教導有成

者列為一等係舉人以小京官即用貢生生員以筆帖式即用已補筆帖式之貢生生員照舉人例用列為中等者再留教習三年如教導有成帶領引

見照例咨送選用不能稱職者禮部不時查叅從之

又吏部奏筆帖式例於繙譯人員內按旗補用但各旗出缺多寡不同請嗣後照各部主事例不論旗分補用得

旨借缺還缺易滋弊端惟是筆帖式一員係各旗出身之路若本旗一時無應補之人即將別旗人員頂補恐行之日久漸至人少嗣後該旗筆帖式缺出如不得應補之人帶領二十員候旨補授

十一年奉

諭旨雲南貴州廣東廣西四川福建六省舉人赴京會試郵程遙遠非近省可比朕意欲於落卷中擇其文尚可觀而人材可用者添取數人候旨錄用以昭朕格外加

恩之意著傳諭主考官於六省試卷遵旨取中外其次等可取之卷不拘數目秉公選出俟發榜後朕另派大臣會同主考官驗看人材更加遴選再六省下第舉子內除願與下科會試者不必報名外若有情願小就以圖即行錄用者著在禮部報名一併交與派出之大臣主考官揀選奏聞請旨

又吏部遵

旨議奏定例滿洲舉人選用小京官漢軍舉人選用知縣

從前漢軍舉人有冒入滿洲額內中式者以致內用外用任意趨避嗣後請令各該旗於考試時將應考人員詳加分別開明咨送順天府如仍有混行冒考中式者查出將咨送之該旗都統佐領等官交部議處舉人革退從之

十二年奉

諭旨鄉試之年宣化府屬另立旦字號與奉天府屬夾字號額數相同各取中三名今宣郡人材較前漸盛又添

蔚州一屬應舉人數加多查夾字號前已廣額二名則  
旦字號應加增中式之數下禮部議定宣化旦字號加  
增中額一名與夾字號各中四名

十三年奉

諭旨縣令為親民之官關係民生休戚最為切近凡選用  
知縣者類多舉人進士出身之人其中才具可觀克稱  
厥職者固多而年老迂疎不諳吏治者亦復不少朕念  
其攻苦寒窻幸登科目不忍遽令放廢於是定以改教

之例每見候選各員有年老才庸不稱縣令之任而苦不自量仍欲勉強謁選其意蓋以縣令為榮希圖僥倖且以到任之後不能辦事仍可改補教職無碍於功名故為苟且姑試之計殊不思以不能勝任之人冒昧銓選及到任之後試看一年半載再請改教其間輾轉更換時日已多事務廢弛之患有必不能免者嗣後科目出身之員若係簡選命往者到任後不勝縣令之任准該督撫以教職題請改補如係月選之員或年力衰邁



或才識庸愚即當於未選之先或臨選之際呈請改教  
若不自量度仍欲銓選知縣該員到任後著該督撫留  
心察看或以才力不及或以溺職分別題叅不得奏請  
改教以遂其自便之私如果有為人謹慎學問優通者  
著該督撫將應否改補教職之處具本聲明送部引見  
請旨

禮部議覆福建巡撫盧焯疏言臺灣鄉試士子向  
係另編字號額中舉人一名今臺灣五學人文日

盛請於閩省解額外將臺灣字號再加中一名以示鼓勵應如所請從之

是年九月

皇上登極

詔增鄉會中額會試額數俟禮部臨期奏請廣額外鄉試大省加三十名次省加二十名小省加十名奉天宣化各加中一名廣東商籍亦於民籍外另額取中二名

皇朝文獻通考卷四十九